

Kaum Ibu Yang Masyhur

Saiyidatina Aishah Ummul Mukminin

Oleh: Dr. Zahiyah Kadurat, Guru Tarikh Islam di Universiti Lubnan

(Disalin Oleh: Abdullah Bin Awang, Penuntut al-Ma'had Muhammadi Kota Baharu)

Aishah ialah anak perempuan Abu Bakar *radīyy Allahu 'anhu*, keturunan dari suku Tim, Quraisy.

Saiyidina Abu Bakar sebelum lagi beragama Islam sudah pun terkenal dengan benar dan amanahnya. Dia dapat menduduki tempat yang tinggi di dalam hati orang-orang Arab. Sebab itulah orang menghormati dan memuliakannya. Dia ialah seorang daripada empat orang yang mula-mula memeluk agama Islam. Dialah juga yang banyak memberi pertolongan mempertahankan agama Islam serta menggalang ganti Rasulullah dari bencana-bencana musuh Islam. Dialah seorang daripada dua orang ketika berada di dalam sebuah gua. (Ketika ia bersama-sama Rasulullah bersembunyi di gua Jabal Nur)

Itulah Abu Bakar al-Siddiq ayahanda Saiyidatina Aishah wanita Islam itu.

Saiyidatina Aishah diperanakkan di Mekah dalam tahun yang keempat sesudah Rasulullah diutus. Menurut satu riwayat yang lain dalam tahun kelima. Lalu diserahkan kepada satu keluarga daripada suku Bani Makhzum untuk memeliharanya. Begitulah adat resam di Semenanjung Tanah Arab. Besarlah Aishah dengan fasih lidah, kuat ingatan, hafaz syair-syair sebagaimana selalu dibacakannya pula. Sesungguhnya dia lebih cenderung

hidup secara kampung dengan memiliki sifat-sifat keberanian, berkemajuan, berbudi bahasa dan pemurah. Sifat-sifat itulah yang membawa kesan besar sekali di dalam hidupnya yang penuh dengan pekerjaan-pekerjaan yang besar dan mulia kemudiannya.

Ini bukan bererti Aishah itu seutama-seutama isteri Rasulullah *ṣallā Allāhu 'alayhi wa sallam* sesungguhnya sebelum dari itu baginda telah pun berkahwin dengan Saiyidatina Khadijah Binti Khuwailid yang tertawan sebab kelebihan-kelebihan junjungan kita. Khadijah yang membentangkan perkara kahwin kepada Rasulullah. Baginda di mulia dan ditolongnya dalam segala urusan.

Rasulullah tidak pun terlintas di hatinya hendak berkahwin selain daripada Khadijah di dalam masa hayatnya, sehingga Khadijah wafat, baginda berdukacita dan di ikuti selepas kematiannya itu dengan cubaan-cubaan dan kedukaan yang amat sangat.

Perkahwinan yang mulia dengan Aishah berlangsung di Mekah tiga tahun sebelum berhijrah (secara nikah gantung). Hari persandingannya baharu berlangsung di Madinah pada tahun yang pertama Hijrah, yang pada waktu itu Aishah baharu berumur sembilan tahun; rumah ayahandanya Abu Bakar

A'isyah ialah anak dara yang pertama dikahwini Rasulullah.

Ketika baginda wafat Aisyah baharu berusia 18 tahun.

Hari persandingan itu sungguh ringkas dan sederhana sekali, tidak meriah dan tidak secara besar-besaran.

Aisyah menetap di rumah Rasulullah dalam sebuah bilik yang terasing daripada bilik-bilik yang lain. Bilik itu diperbuat daripada bata-bata dan batang-batang tamar. Perkakas-perkakas rumah Aisyah itu sangat berpadanan dengan hamparan yang ada di dalamnya. Berkata Aisyah: Tidak ada di dalamnya melainkan sehelai tikar sahaja pada mulanya dan ditambah dengan sehelai

lagi kemudiannya.

Perkakas-perkakas rumah ini adalah serupa juga

dengan rumah-rumah yang lain, begitu pula makanan isi rumah itu. Aisyah memakan makanan yang dimakan oleh isteri-isteri junjungan yang lain iaitu buah tamar, susu, buah-buahan dan minum-minuman.

Dalam rumah yang ringkas inilah ia tinggal yang mana membawa Rasulullah senyum ketawa dalam mencari kegembiraan dan kesukaan hidup bersama dengan isteri-isterinya.

Aisyah menghabiskan hidupnya di Madinah di rumahnya, yang juga menjadi tempat Rasulullah



Sebahagian daripada penuntut kelas menengah Madrasah al-Tarqiyyah al-Islamiyyah Majlis Agama Islam Narathiwat

Selatan Thailand, bergambar ramai kerana menyambut hari raya Aidil Adha 1380. Duduk dari kanan

saudara-saudara: Daud Haji Din, Haji Ahmad Shauki dan Ilias Syukri. Berdiri dari kanan saudara-saudara:

Husin Rusli, Ismail Muhammad, Abdul Rashid dan Muhammad Zin Haji Abdul Latif.

dimakamkan dan di sebelahnya dikuburkan dua orang sahabatnya iaitu Abu Bakar dan Umar, maka jadilah rumah Aisyah kubur tiga orang besar Islam di Tanah Haram tempat suci Islam selain daripada Ka'abah.

Junjungan kita sangat sayang kepada Aisyah melebihi isteri-isterinya yang lain kerana sifat-sifatnya yang tertentu. Dan pertaliannya dengan ayahandanya Abu Bakar. Amru ibnu al-'Āṣ pernah bertanya kepada Rasulullah: Siapakah orang yang terlebih Rasulullah kasihi? Jawab baginda: Aisyah, kata Amru lagi: Saya maksudkan yang lelaki, jawab baginda: Ayahandanya.

Aisyah dapat jagaan dan ambil berat Rasulullah serupa dengan yang dibuat kepada kanak-kanak, dengan kasih sayang sehingga dia sendiri dapat bermain dan bermanja-manja.

Aisyah pun sangat-sangat kasih sayang terhadap Rasulullah serta mendapat kebahagiaan yang telah dikurniakan oleh Allah terhadapnya. Dia selalu menyebut-nyebut dengan berkata: Siapakah perempuan yang lebih beruntung di sisi suaminya selain daripadanya?

Inilah selayang pandang riwayat hidup Sayidatina Aisyah *Rađīya Allāhu 'Anhā* wanita utama Islam itu. Ada pun kesannya terhadap masyarakatnya, maka berhajat kepada suatu kajian yang tersendiri pula, hanya kita boleh meletakkan atau menggariskan beberapa garisan yang besar yang meliputi segi-segi hidup, iaitu dari segi ilmu pengetahuan, sosial dan politik.

Ada pun kesannya dalam ilmu pengetahuan maka adalah terang dan nyata, boleh jadi suasana di sekelilingnya dan pendidikan yang diterima daripada kedua ibu bapanya yang membentuk peribadinya dan budi pekertinya. Suasana padang

pasirlah yang menghimpunkan sifat-sifat seperti: Fasih lidah, kuat keterangan dan lain-lain, lebih-lebih lagi kerana ia dididik di rumah Abu Bakar sebijak-bijak orang dari suku Arab. Sayidina Abu Bakar juga ialah sahabat yang paling akrab kepada Rasulullah dan terlebih alim mengenai hukum-hukum Islam serta berpegang teguh terhadap ajaran-ajaran Rasul Allah. Tidak syak lagi bahawa Aisyahlah yang banyak mengikuti jejak ayahandanya Abu Bakar, kemudian berumah tangga pula dengan Rasulullah yang mana dialah seorang perempuan yang banyak berhubung dengannya yang menambahkan lagi keahliannya,

Lebih-lebih lagi kerana persediaan semula jadi yang ada di dalam dirinya, Rasulullah menaruh sepenuh-penuh kepercayaan kepadanya dan mengajarnya masalah agama. Nabi banyak sekali memberitahu perbuatan-perbuatannya supaya mudah orang datang bertanya kepadanya mengenai perkara-perkara agama yang rumit-rumit. Tidak syak lagi bahawa junjunganlah yang mengambil berat terhadap segala perjalanan hidupnya lebih daripada yang lain dengan dalil bahawa dialah yang membawa gambaran hidup ini, tidak isteri-isterinya yang lain.

Setelah junjungan kita wafat baharulah Aisyah masak betul. Jadilah ia tempat tumpuan utama berkenaan dengan hukum-hukum Islam, bukan sahaja Madinah malah di seluruh dunia Islam. Khalifah-khalifah sendiri mengajak Aisyah bermesyuarat berkenaan dengan perkara-perkara negara hinggalah ia wafat dalam masa pemerintahan Bani Umayyah iaitu dalam masa Khalifah Muawiyah.

Kelebihan Aisyah yang terang dan nyata ialah berkenaan dengan meriwayatkan hadis. Ulama-ulama hadis banyak sekali berpegang kepada hadis yang di nukil daripadanya. Semua yang di nukilnya adalah benar. Ibu al-Zubayr bila meriwayatkan hadis berkata: Demi Allah tidak sekali-kali Aisyah berdusta

terhadap Rasulullah *ṣallā Allāhu ‘alayhi wa sallam*. Masruq

pula berkata ketika mengambil hadis daripadanya: Diceritakan

kepada aku oleh *al-ṣādiqah* (perempuan yang benar).

Aisyah termasuk salah seorang daripada enam orang sahabat yang banyak ilmu pengetahuan sehingga hadis-hadis yang diriwayatkan olehnya lebih daripada 2210 hadis.

Aisyah bukan sahaja setakat mengetahui hadis malah ia juga mengetahui hukum-hukum fiqh. Ilmu pengetahuannya dalam hadis dan undang-undang Islam penuh tepu. Ahli-ahli negara dan ahli-ahli fiqh mengambil hukum-hukum daripadanya. Ada setengah orang mengatakan satu perempat daripada hukum-hukum agama diambil daripadanya.

Aisyah bukan sahaja ahli hukum, malah ia melebihi orang lain dalam segala hal. Dia pernah

memberi fatwa dalam masa ayahanda Saiyidina Abu Bakar

menjadi khalifah dan juga dalam masa Saiyidina Umar

dan Saiyidina Uthman. Mereka bertanya beberapa masalah agama hingga dia meninggal dunia. Hakim-hakim berkumpul di sisinya untuk mengetahui beberapa masalah yang sulit. ‘Imran bin Ḥaṭṭān berkata: Aku berada di sisinya ketika ia sedang memberi peringatan kepada hakim-hakim.

Ada pun mengenai hukum membahagi pusaka,

sesungguhnya dia mahir betul. Masrūq berkata: Kami lihat sahabat-sahabat Nabi yang masyhur sedang bertanya Aisyah berkenaan dengan hukum membahagi pusaka.

Saidatina Aisyah di samping keahliannya di dalam hal agama: Perawi hadis, ahli fiqh, maka ia mempunyai kelebihan yang lain pula iaitu fasih lidah berkata-kata,

Siri sejarah hidup Nabi Muhammad

Ṣallā Allāhu ‘alayhi wa sallam

Di susun oleh

Edrus

Buku ini disusun dipersuaikan dengan sukanan pelajaran

sejarah Islam untuk pelajaran agama di sekolah kebangsaan

di Persekutuan Tanah Melayu. Berpenggal-penggal: 1. Hashim bin Abd Manaf, 2. Abd al-Muṭṭalib, Nenda Nabi, 3. Abdullah dan Aminah – Ayah Bonda Nabi, 4. Hari Diperanakkan, 5. Halimah al-Sa‘adiyyah, 6. Yatim Piatu, 7.

Berkahwin Dengan Siti Khadijah, 8. Menerima Wahyu.

Buku ini mengandungi 24 buah. Sambungannya akan segera diterbitkan oleh Qalam Singapura. Harga 30

sen senaskhah. Belanja mengirim 10 sen.



ia hafaz sha'ir-sha'ir atau qasidah-qasidah, serta selalu membaca 60 hingga 100 bait dan menceritakan maksud-maksudnya.

Begitu sekali luas pengetahuannya berkenaan cerita-cerita Arab purbakala dan keturunan-keturunan mereka.

Ada pun kesannya dari segi politik, maka bolehlah dikatakan Aisyah mengambil peranan yang penting sekali dengan masuk campurnya dalam masalah khilafah (jawatan khalifah) pada masa akhir pemerintahan Saiyidina Uthman atau pada masa permulaan pemerintahan Saiyidina Ali *karam Allahu wajhah*, yang mana akhirnya timbul satu kejadian yang terpenting dalam sejarah¹ Islam iaitu peperangan “al-Jamal”. Dalam peperangan ini terlibat sahabat-sahabat dan pembesar-pembesar Islam yang menyebabkan terjadi perpecahan fikiran beberapa orang yang masuk campur dalam peperangan itu.

Dan kesannya kepada masyarakat ialah dengan memandang kepada kedudukannya sebagai orang yang lebih hampir kepada Rasulullah *sallā Allāhu ‘alayhi wa sallam* dan banyak berhubung dengannya, selain daripada itu, maka dialah wanita utama dalam Islam. Oleh sebab itulah dia selalu memberi nasihat dan pertunjuk-pertunjuk bila dia merasa wajib berbuat demikian, untuk mengatur masyarakat Islam atas satu bentuknya mengikut susila hidup Rasulullah dan rumah tangganya.


Dia betul-betul memikul tanggungjawab sebagai wanita utama Islam. Dia mengambil tahu hal ehwal orang-orang Islam, dia mengasihi orang-orang miskin dan diberi bantuannya pula sedapat-dapatnya. Dia selalu bertanyakan si sakit dan merawatnya.

Bila Aisyah sakit, maka dukacitalah orang ramai

dan dengan segera orang datang bertanyakan kesihatannya.

Tetapi ia merasai ajal itu telah hampir benar kepadanya dan hidup sudah tidak berharga lagi lalu berwasiat supaya dikuburkan di Baqī'. Wafatlah Aisyah ketika berumur 66 tahun pada malam Selasa 17 Ramadān tahun 58 hijrah, dikuburkan di Baqī' seperti yang disuruhnya dan disembahyangkan oleh Abū Hurayrah.

Demikianlah lipatan sejarah terakhir seorang srikandi Islam yang menjadi wanita utama Islam.



Suatu pemandangan yang indah dalam Masjid Rasul

Allah *sallā Allāhu ‘alayhi wa sallam* di Madinah al-Munawwarah.

¹ Perkataan sebenar ialah sejarah

Tinjauan Luar Negara

Berlin, Bandar Kesenian dan Bom Atom

Berlin, bandar yang berperistiwa, telah menyalakan dua perang besar dunia. Berlin ialah ibu negeri Jerman, pusat muzik, sekolah-sekolah gambar dan panggung-panggung opera yang masyhur di seluruh Eropah. Dari Berlinlah terpancar rahsia mengetahui uranium, dan di Berlin juga mula-mula timbul fikiran untuk mencipta bom atom dari uranium tersebut.

Berlin sebelum perang menjadi bandar yang keempat di dunia kemudian daripada London, New York dan Paris, dan selepas perang telah menjadi bandar yang kesembilan, sesudah berjuta-juta pendukunya¹ keluar membawa diri dan beribu-ribu pula yang telah mati. 75 peratus dari rumah-rumah dan bangunannya telah runtuh atau rosak akibat perperangan.

Berlin telah kembali semula menjadi pusat perusahaan barang-barang pertukangan di seluruh Eropah.

Berlin di Lapah-lapah

Bandar Berlin telah dilapah-lapah oleh Pihak Berikat yang telah mengalahkan Hitler, dan dibahagikan kepada 4 bahagian:

Untuk Soviet Rusia: 45.6 peratus

Amerika: 23.9 peratus

Britain: 18.7 peratus

Perancis: 11.8 peratus

Demikian pembahagiannya, meskipun Soviet Rusia lah yang mula-mula masuk mendudukinya dan Stalin sendiri yang mengumumkan kejatuhan Berlin.

Tiga bahagian (selain daripada bahagian Soviet)

terkenal dengan nama Berlin Barat, dan yang sebahagian lagi, yang dikuasai oleh Soviet terkenal dengan nama Berlin Timur.

Berlin Barat: Luasnya 480 kilometer persegi dan jumlah penduduknya dua juta suku.

Manakala Jerman Timur pula: Luasnya 400 kilometer persegi dan penduduknya sebanyak satu juta lebih sedikit.

Jumlah Perempuan Lebih Daripada Kaum Lelaki

Di Berlin bandar yang indah, jumlah perempuan melebihi jumlah lelakinya, iaitu 1360 orang perempuan bagi tiap-tiap 1000 orang lelaki.

Berlin juga telah mengemukakan 20 orang yang telah menang dengan mendapat hadiah Nobel, iaitu jumlah yang besar di seluruh dunia yang pernah dikemukakan oleh sebuah bandar.

Rahsia Uranium dan Bom Atom

Dari bandar Berlin inilah juga "Klaproth" semenjak 179 tahun yang lalu, telah mengumumkan berita tentang uranium mula-mula diketahui.

Kemudian datang ((Otto Hahn) dan ((Strassmann)) (dari Berlin juga) pada kira-kira setahun sebelum perang lalu mengumumkan tentang kebolehan memecahkan zarah uranium, dan kemudiannya tentang cara membuat bom atom.

Berlin hari ini masih menjadi punca perbalahan di antara Rusia komunis dan kuasa-kuasa barat.

-Penyunting

¹ Ejaan sebenar ialah penduduknya